



Iulius ex nobili familia Pflugiorum in Saxonia natus est. Is cum felici ingenio esset præditus, à pueris operam literis dedit, & prima artium fundamenta in patria iecit. Postea sese ad aliquot academias contulit, & breui magnam sibi eruditionem cõparauit. In studio quoq; Theologico adeò profecit, ut etiam doctissimis Theologis comparari posset. Accedebat & uitę integritas, cum singulari eloquentia. Itaq; apud Catholicę religionis principes magnam sibi authoritatem comparauit, & sæpius ipsorum consilijs, cum de religione ageretur, interfuit. Cum etiam Carolus Cæsar anno 1541 Ratisbonę comitia celebraret, & de religione collo-

quium doctorum uirorũ, de controuersis religionis articulis, celebraret, hunc Iulium, Eckium, & Gropperum ex una parte, ex altera Melanctonem, Bucerum, & Pistorium interloquentes constituit. Ibi Iulius magna diligentia cum alijs contulit, & Euāgelicis plus alijs attribuit, ita ut etiam ab Eckio apud principes accusaretur. Verũ is sese honestè excusauit, & præclarum integritatis testimonium à Cæsare impetrauit. Itaq; cum Numburgensis præsul obiisset, Iulius in eius locũ à collegio substituitur. Verũ cum Ioannes Fridericus Saxonię elector repugnaret, & Nicolaum Ambstorffium substituisset, Iulius in possessionem venire nõ potuit. Vnde is emissis libellis ad ordines Imperij ius suum demonstrauit, & de iniuria conquestus fuit, ita ut postea Mauritius Saxo eius causam approbaret, propinquis eum principi commendantibus. Postea quoq; cum Anno Christi 1546 denuò colloquium Ratisbonę institutum esset, Iulius inter præsides à Cæsare nominatus interfuit, & suam doctrinam ostendit.